



**Sud Bosne i Hercegovine**  
**Суд Босне и Херцеговине**

---

*Broj: SI 3 Iž 030580 18 Iž*  
*Sarajevo, 02.10.2018. godine*

*Sud Bosne i Hercegovine u Sarajevu, u apelacionom upravnom vijeću sastavljenom od sudija, Vesne Trifunović, predsjednika vijeća, Dinke Bečlagić-Čovrk i Srete Crnjak, članova vijeća, odlučujući o žalbi Demokratske fronte Sarajevo, ul. Salih Udžvarlića br. 10 izjavljenoj protiv odluke Centralne izborne komisije Bosne i Hercegovine, broj: 05-1-07-5-872/18 od 25.09.2018. godine, u pravnoj stvari izricanja novčane kazne, u nejavnoj sjednici održanoj dana 02.10.2018. godine, donio je*

**RJEŠENJE**

***Žalba se odbija.***

***O b r a z l o ž e n j e***

*Odlukom Centralne izborne komisije Bosne i Hercegovine, broj i datum navedeni u uvodu, utvrđena je odgovornost političkog subjekta DF-GS, Željko Komšić:BIH BOBJEĐUJE iz razloga što se Adžem Dževad kao kandidat navedenog političkog subjekta za Zastupnički dom Parlamenta Federacije BiH dana 10.09.2018. godine na svom facebook profilu, koristio jezikom koji bi nekoga mogao navesti ili podstaći na nasilje ili širenje mržnje, čime je prekršio pravila ponašanja u izbornoj kampanji iz člana 6.7) tačka 1. Izbornog zakona BiH pa je novčana kazna izrečena i to:*

- političkom subjektu DF-GS, Željko Komšić:BIH POBJEĐUJE u iznosu od 1.000,00 KM koje će snositi solidarno članice ove koalicije Demokratska fronta i Građanski savez u iznosu od po 500,00 KM, i*
- Adžem Dževadu, kandidatu političkog subjekta DF-GS, Željko Komšić:BIH POBJEĐUJE za Zastupnički dom Parlamenta Federacije BiH, u iznosu od 3.000,00 KM.*

*Demokratska fronta je blagovremeno uložila žalbu na navedenu odluku. U žalbi, se navodi da su navodi koji se stavljaju na teret Dževadu Adžemu izneseni na privatnom Facebook profilu Dževada Adžema i kao takvi nisu namijenjeni široj javnosti te ne odražavaju stavove koalicije DF-GS, odnosno njenih članova.*

*Stoga predlaže da se pobijana odluka CIK-a BiH u dijelu odgovornosti političkog subjekta DF-GS poništi.*

*Centralna izborna komisija BiH je u odgovoru na žalbu predložila da se žalba odbije kao neosnovana.*

*Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.*

*Pravilna je i zakonita odluka Centralne izborne komisije Bosne i Hercegovine kojom je utvrđena odgovornost navedenog političkog subjekta i kandidata tog subjekta zbog prekršenih pravila ponašanja u izbornoj kampanji za Opće izbore 2018. Godine.*

*Naime, u konkretnom slučaju prekršena su pravila putem internetske komunikacije imajući u vidu da je Facebook internetska društvena mreža koja je pristupačna ogromnom broju građana i ima veliki broj korisnika. S obzirom na tu nepobitnu činjenicu, ne mogu se prihvatiti osnovanim navodi žalbe da osporeni tekst iznesen na privatnom Facebook profilu Dževada Adžema nisu namijenjeni široj javnosti. Ovo pogotovu iz razloga što je u toku izborna kampanja za Opće izbore 2018. Godine tokom koje u smislu odredbe člana 7.3. stav 1 tačka 7 nije dozvoljeno kandidatima i pristalicama političkih stranaka kao i svim učesnicima na izobrima da se koriste jezikom koji bi nekoga mogao navesti ili podstaći na nasilje ili širnje mržnje između ostalog i putem internetske komunikacije.*

*Kada je u pitanju odmjeravanje novčane kazne, apelaciono vijeće nalazi da Centralna izborna komisija BiH pravilno cijenila težinu učinjenih povreda člana 7.3 stav 1. tačka 7. Izbornog zakona BiH i stepen odgovornosti žalitelja. Naime, članom 19.9 istog zakona je propisano da će se za ovu povredu politički subjekt kazniti novčanom kaznom u iznosu od 1.000,00 KM do 10.000,00 KM. U konkretnom slučaju utvrđena kazna od 1.000,00 KM je određena u granicama propisanim zakonom, i ista je prema ocjeni ovog vijeća, srazmjerna učinjenom prekršaju, naročito imajući u vidu težinu učinjene povrede i činjenicu da žalitelj nije povratnik u kršenju odredbi Izbornog zakona BiH.*

*S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02 do 74/10) valjalo odbiti.*

***PREDSJEDNIK VIJEĆA  
S U D I J A  
Vesna Trifunović***